

Ley di RAft a pasa pa pasado:

Prome minister a anuncia cu Consejo di Minister di Reino a revoca e ley di RAft pa Aruba

Ayera mainta prome minister demisionario Evelyn Wevr-Croes a tene un conferencia di prensa extraordinario durante cual el a anuncia cu durante Consejo di Minister di Reino na Hulanda a concretisa cu lo elimina RAft (Rijkswet Aruba Financieel Toezicht) for di mesa. Alabes la informa tambe cu Consejo di Minister di Reino a pone un deadline pa Parlamento di Aruba trata presupuesto 2025.

Diabierna durante e reunion di Consejo di Minister di Reino dos decision cu ta impacta Aruba a ser tuma. Minister Plenipotenciario, Ady Thijsen, a informa prome minister cu Consejo di Minister di Reino a trek in e Ley di RAft y cu di otro banda ta pone Aruba na un deadline pa trata presupuesto 2025 y e deadline aki ta 31 di maart.

Elaborando riba e prome punto menciona, e eliminacion di Rijkswet for di mesa, e mandatario a splica cu manera hopi ta corda e RAft tabata un di e condicionnan cu Hulanda a pone e tempo ey pa por a yuda Aruba atraves e pandemia. Desde principio gobierno tabata sa cu e tabata un ley cu no tabata bon pa Aruba y for di e momento ey a negocia te cu awe nan a logra cu el a ser elimina for di mesa.

Prome minister a recorda cu manera ta conoci na momen-

to cu pandemia a yega Aruba, gobierno mester a bay bati na porta di Hulanda pa fia placa. Den luna di mei Hulanda a presta Aruba un cantidad di placa, y despues na juni tambe pero e nan ora a bisa cu despues di esey nan lo duna placa solamente si bay di acuerdo cu dos ley di Reino.

E dos leyman aki tabata e COHO y e otro tabata e RAft. E COHO tabata pa Aruba, Corsou y Sint Maarten y e RAft tabata p Aruba so.

E mandatario a sigui splica cu na e momento ey caba Gobierno di Aruba tabata sa cu ningun di dos ley cu Hulanda a presenta tabata bon pa Aruba. Gobierno a yama reunionnan cu stakeholders, gremionan sindical y comercial, y politiconan na Aruba pa crea un frente nacional pa con ta bay atende cu esaki.

El a indica cu e pensamiento di e gran mayoria, no unanime, tabata pa no acepta e leyman aki manera nan ta pero pa sigui negocia. Gobierno a informa Hulanda cu no por acepta loke tin riba mesa pero kier sigui negocia. Despues di esaki, na luna di november 2020, a yega a un acuerdo cu Hulanda cu ta bay cuminsa manda e leyman cu ta den proceso pa e bay Raad van State.

Den luna di maart 2021 Raad van State a emiti su conseho riba e leyman aki y principalmente riba e RAft e tabata



hopi negativo y a indica cu nan ta wak e RAft como algo malo pa Aruba.

Despues di esaki, el a sigui splica, nan a sigui negocia cu Hulanda y tabata enfoca riba e COHO, hunto cu Corsou y Sint Maarten, y na april 2023 a logra pa elimina e COHO for di mesa y na su luga a bin un onderlinge regeling.

Pa loke ta e RAft gobierno a sigui na mesa y na mei aña pasa a yega na e palabracion cu e tempo ey Secretario di Estado Van Huffelen, cu e ta bay elimina e Rijkswet y ta sigui na mesa pa yega na otro tipo di Rijkswet di supervision financiero.

Durante e Consejo di Minister di Reino a keda concre-

tisa cu awor e RAft tambe a ser ingetrokken y ta pasa pa pasado.

“Mi ta hopi contento cu esaki pasobra ambos ley no tabata bon pa Aruba, e RAft sigur cu e no tabata bon pa Aruba. Y mi ta hopi contento tambe pasobra esnan di nos cu realmente a kere den Aruba awe ta bolbe haya rason. Aruba tin potencial grandi, loke nos tin cu haci ta kere den nos profesionalnan,” el a indica.

E mandatario a ratifica cu Aruba tin supervision. Aworaki e RAft ta ser kita, pero esey no kiermen cu no tin supervision. Tin supervision financiero pasobra CAft t’ey y e ta hancra den ley di LAft.

Awor e pregunta ta kico ta pasa siguiente. Hulanda a indica cu e tabata dispuesto pa presta e placa durante e temporada di Covid na un interes di 6.9% y a bisa cu si Aruba ta dispuesto pa regla supervision financiero den un ley di Reino e ora nan ta dispuesto pa baha e interes te na 3.4%. E negociacionnan ey a cuminsa desde aña pasa mei y ta andando ainda.

“E ta bayendo bon y den e periodo di negociacion e interes a baha di 6.9% pa 5.1% y si logra cu Rijkswet e ta baha na 3.4%.

Manera ya caba a ser menciona anteriormente, gobierno ta den negociacion y ta den espera di e rapport di IMF cu, segun e mandatario a bisa,

lo mester keda cla e siman aki ainda. A base di e rapport aki e ekiponan di Hulanda y Aruba ta topa otro siman pa delibera riba e rapport aki y pa fiha kico ta e puntonan cu ta bay dilanti. El a indica cu despues cu fiha e puntonan aki nan por informa comunidad kico ta locual cu ta e puntonan cu ainda ta ser negocia riba dje.

E fecha di dia 1 di mei ainda t’ey y si logra keda cla cu e ley y entrega esaki pa 1 di mei, e interes di e prestamo ta baha ainda mas.

E acuerdo pa elimina RAft for di mesa a ser firma na mei aña pasa cu Secretario di Estado Van Huffelen. Despues cu a firma esaki, a tuma tempo pa concretisa e acuerdo y ayera durante reunion Consejo di Minister di Reino esaki a bira realidad.

Di dos decision cu Consejo di Minister di Reino a tuma cu ta afecta Aruba ta trata e deadline di 31 di maart cu a pone pa trata presupuesto 2025 di Aruba. Lesa mas informacion tocante esaki den nos siguiente edicion di Bon Dia Aruba.



Like us on Facebook

facebook.com/bondianoticia